

Penyarah perlu buat penyelidikan, penerbitan

UB 06.11.2012 A7

LABUAN: Penyarah perlu membuat penyelidikan dan penerbitan selain mengajar di bilik kuliah kepada pelajar.

Pengarah Universiti Malaysia Sabah, Kampus Antarabangsa Labuan (UMS-KAL), Prof Madya Dr Ismail Ali berkata selain untuk meningkatkan kerjaya mereka, bidang penyelidikan dan penerbitan diperlukan semasa penilaian prestasi kenaikan pangkat.

Katanya, semua ahli akademik di Sekolah Perniagaan dan Kewangan Antarabangsa Labuan (SPKAL) dan Sekolah Sains Informatik Labuan (SSIL) perlu memperbanyakkan bidang penyelidikan dan penerbitan untuk kebaikan kerjaya mereka pada masa akan datang.

“Penyarah SPKAL dan SSIL perlu menubuhkan satu pasukan penyelidikan dan inovasi bagi memastikan

mereka sentiasa aktif dalam bidang berkenaan,” katanya.

Beliau berkata demikian pada Majlis Perjumpaan Pengarah UMS-KAL Bersama Kakitangan Akademik di Dewan Theatre, kelmarin.

Turut hadir Dekan SPKAL, Prof Madya Dr Syed Nasirin Syed Zainul Abidin, Dekan SSIL, Dr Ag Asri Ag Ibrahim dan Timbalan Pendaftar, Zamri Mohamad Tuah.

Pada majlis itu, Ismail turut berdialog dengan kakitangan akademik mengenai proses pengajaran dan pembelajaran serta kemudahan teknologi maklumat (ICT) di bilik kuliah.

Beliau turut memaklumkan beberapa kemudahan termasuk klinik untuk warga, taska, bilik kuliah, bilik penyarah dan ICT yang sentiasa diperlukan penyarah dan pelajar sedang dinaik taraf.

Padamasasama, beliau mahu hasil karya penyarah kedua-dua sekolah dipamerkan di ruang legar universiti untuk tatapan dan bacaan pelajar dan pengunjung sebagai sumbangan yang sangat bernilai kepada UMS-KAL.

“Kita perlu membudayakan amalan membaca dalam kalangan semua warga universiti termasuk pelajar, kakitangan sokongan dan penyarah,” katanya.

Selain itu, Ismail menasihatkan penyarah agar tidak mengamalkan ideologi politik kepartian bagi menjaga imej universiti serta tidak membabitkan pelajar yang perlu fokus kepada pelajaran.

Beliau juga meminta semua penyarah supaya memberikan sokongan padu kepada dekan dan timbalan dekan serta mengadakan perbincangan sekiranya terdapat masalah secara baik dan harmoni.



SEBAHAGIAN penyarah SPKAL dan SSIL yang menghadiri Majlis Perjumpaan Bersama Pengarah UMS-KAL di Dewan Theatre, kelmarin.